

Umiarsualivimmiinnermut akileraarutit pillugit Inatsisartut inatsisaat

§ 1. Umiarsuit Kalaallit Nunaanni umiarsualivinnut nunalittut akileraarummik landskassemut akiliisassapput.

§ 2. § 1 naapertorlugu makku akileraarummik akiliisussaangillat:

- 1) Angallatit aalisariutit Kalaallit Nunaanni angerlarsimaffeqartutut nalunaarsorneqarsimasut.
- 2) Nunat allamiut angallataat aalisariutit Kalaallit Nunaanni aalisarnermik suliffeqarfinnit attartorneqartut.
- 3) Umiarsuit Kalaallit Nunaanni angerlarsimaffeqartutut nalunaarsorneqarsimasut 200 bruttoton-imit (BRT/BT-mit) minnerusumik angissuseqartut.
- 4) Sorsuutit danskinit nunanillu allanit pigineqartut kiisalu danskit nunallu allat naalagaaffisa umiarsuaataat.
- 5) Umiarsuit Namminersornerullutik Oqartussanit, Kalaallit Nunaanni kommunemit imaluunniit danskit naalagaaffiannit pigineqartut attartorneqartulluunniit.
- 6) Umiarsuit aseruatersimasut usimik allagartaat malillugit umiarsualivimmut pineqartumut nunalittussaangikkaluartut.
- 7) Umiarsuit taamaallaat pujorsiutiminnik aaqqiiniarlutik, nakorsamik atorfissaqartitsillutik, inuttatik nikissallugit, napparsimasunik, toqusunik umiusimasunik, imaani umiarsuarmut ikisaminnik imaluunniit ilisimasortamik nusiartorlutik umiarsualivimmut nunalinniartut.
- 8) Umiarsuit taamaallaat ilisimasassarsionnermut imaluunniit ikiuiniarnermut atorneqartartut.
- 9) Umiarsuit nunaqarfinnik isorliunerusunillu pilersuinermi aalajangersimasunik ingerlaarfeqartut.

§ 3. Akileraarut naatsorsorneqassaaq bruttoton-imut (BRT/BT-imut) ataatsimut akit uku naapertorlugit:

- 1) umiarsuit ilaasartaatit nal.ak. 24-t aallartinneri tamaasa 0 kr. 70 øre,
- 2) angallatit aalisariutit Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasut nal.ak. 24-t aallartinneri tamaasa 0 kr. 70 øre,
- 3) umiarsuit nassiussanik angallassisartussatut sananeqarsimasut sap.ak. aallartinneri tamaasa 20 kr. 00 øre,
- 4) umiarsuit allat nal.ak. 24-t aallartinneri tamaasa 5 kr. 00 øre.

Imm. 2. Umiarsuit imm. 1, nr. 3-mi taaneqartut, nassiussanik usilersortut usingiartulluunniit aammattaaq akileraarut akilertassavaat bruttoton-imut (BRT/BT-imut) ataatsimut sap.ak. aallartinneri tamaasa 20 kr. 00 øre.

§ 4. Naatsorsuinissamut tunngaviusussap naatsorsornerani bruttoton-imut imaluunniit bruttoregister-ton-imut ilivitsumut qaninnermut airanut akunnaalliisoqassaaq.

§ 5. Akileraarutitut akiligassaq umiarsuup nmiarsualivimmut nunalinnerani akiligassanngussaaq.

Imm. 2. Akileraarutitut akiligassaq Akileraartarnermi Pisorta qarfiiranut kingusinnerpaamik akilerneqassaaq umiarsuup aallalernerani.

Imm. 3. Umiarsuit umiarsualiviiranut ataatsimut arlalinnulluunniit aalajangersimasumik nunalittartut imm. 2-mi aalajangersakkanit allaanerusumik akiliuteqarnissaat pillugu Akileraartarnermi Pisorta qarfirmmik isumaqatigiissuteqartoqarsinnaavoq.

§ 6. Umiarsuup akileraarutitut akiligassaasa annertussusaat naatsorsorneqarsinnaanngippat Akileraartarnermi Pisorta qarfik missingersuussinikkut akileraarutitut akiliutissamik angissusiliisinnaavoq.

§ 7. Akileraarutitut akiligassaq piffissaagallartillugu akilerneqanngippat, ullormit piffissaagallartillugu akiliiffissamit kingullermiit qaammatip aallartinneri tamaasa ernianik 2 pct.-iusunik akiliisoqartassaaq, minnerpaamilli 500 koruuninik.

§ 8. Inatsisartut inatsisaat una naapertorlugu Akileraartarnermi Pisorta qarfiup aalajangiinera pillugu nalunaaruiranik tigusinerup kingorna sap.ak. sisamat qaangiutsinnagit aalajangiineq Naalakkersuisunut naammagittaal1iuutigineqars innaavoq.

Imm. 2. Naalakkersuisut aalajangiinerat qaammatit pingasut qaangiutsinnagit eqqartuussisunut ingerlateqqinneqars innaavoq.

§ 9. Pisortat oqartussaasut kiisalu umiarsuit naalagaat, umiarsuaatileqatigiit, tuniniaatitat, isumaqatigiissitsiniartut, nassiussanik aaqqissuillutillu ingerlatitsisartut il.il. qinnuigineqarnermikkut Akileraartarnermi Pisorta qarfirmmut paasissutissanik sunilluunniit Akileraartarnermi Pisorta qarfiup Inatsisartut inatsisaat una naapertorlugu nakkutilliinerminut aalajangiinissaminulluunniit atorfissaqartitaanik nalunaaruteqartussaapput.

§ 10. Akileraarutitut akiligassap akilerneqarnissaanut Inatsisartut inatsisaat una naapertorlugu umiarsuaatilik, piginnittoq, atuisoq, assartuisoq imaluunniit pisortaasoq akisussaapput.

§ 11. Umiarsuit akileraarutitut aammalu akiliisitsissutitut akiligassaat kiisalu suliamut atatillugu aningaasartuutit akiitsoriligaat akilerneqarserlugit imaluunniit akilerneqarnissaat qularnaveeqquserneqarserlugu Akileraartarnermi Pisorta qarfiup qinnuteqarneratigut politiinit tigummineqarallarneqarsinnaapput. Tamanna qaammatit marluk qaangiutinnginnerini pinngippat umiarsuup tuniniarneratigut akiitsut akilersinneqarsinnaapput.

Imm. 2. Tigumminnikkallarsinnaaneq taamaallaat pisinnaavoq akiligassanut qularnaveeqqutitut piumasarineqarpat. Umiarsuaq ingerlatitsisuminit tillitaasimappat tigumraigallarneqarsinnaanngilaq.

§ 12. Inatsisartut inatsisaata atuutsinnissaanut Naalakkersuisut maleruagassiorsinnaapput aammalu umiarsuit ilaasa akileraarutitik akiliinnginnissaannik oqilisaaffigineqarnissaannilluunniit

aalajangersagaliorsinnaallutik.

Imm. 2. Immikkut ittunik pissutissaqartoqartillugu Naalakkersuisut akileraarutininik akiliinngitsortitsillutilluunniit oqilisaaffiginnissinnaapput.

§ 13. Naalakkersuisut Akileraartarnermi Pisorta qarfik piginnaatissinnaavaat pisortat oqartussaasuininik allanik allanilluunniit peqqusinissaanut, Akileraartarnermi Pisorta qarfik suleqatigalugu taassumalu ilitersuinerana naapertorlugu, Inatsisartut inatsisaat una naapertorlugu Akileraartarnermi Pisorta qarfimmuut pisussaaffiliunneqarsimasunik pisinnaatitaaffiliunneqarsimasunillu isumagininnissaannik.

§ 14. Kinaluunniit piaaraluneerluni mianersuaalliorujussuarluniluunniit makku pillugit akiliisinneqarsinnaavoq:

1) akileraarutit naatsorsorneqarnissaannut taakkualu nakkutigineqarnissaannut atugassanik eqqunngitsumik paasinerlunneqarsinnaasumilluunniit paasissutissiisoq imaluunniit paasissutissanik nipangiussiinnartoq, imaluunniit

2) akileraarutininut tunngavissap missingersuussinikkut angissusilerneqarsimasup nalunaarutigineqarneraniit angissusiliinerup appasippallaarneranik nalunaarummik tigusinermit kingusinnerpaamik sap.ak. sisamat qaangiunnerini Akileraartarnermi Pisorta qarfimmuut ilisimatitsinngitsaq.

Imm. 2. § 9-mi aalajangersakkamik malinnikkumanngitsaq akiliisinneqarsinnaavoq.

Imm. 3. Inatsisartut inatsisaata matuma kingunerisaanik maleruagassiornikkut kinaluunniit maleruagassiani aalajangersakkanik piaaraluneerluni mianersuaalliorujussuarluniluunniit unioqqutitsisoq akiliisinneqarsinnaavoq.

Imm. 4. Aktieselskabit, anpartsselskabit/ andelsselskabit, piginneqatigiillutik umiarsuaatileqatigiit assigisaalluunniit unioqqutitsippata piginneqatigiiffik akiliisinneqarnissamut akisussaatinneqarsinnaavoq.

§ 15. Naalakkersuisut imaluunniit Naalakkersuisut tamatumunnga piginnaatitaata Inatsisartut inatsisaanni matumani aalajangersakkanik unioqqutitsisoq nalunaarfigisinnaavaat suliassap eqqartuussinertaqanngitsumik naammassineqarsinnaanerani, unioqqutitsisup unioqqutitsinini nassuerutigippagu akiliisitsissullu nalunaarummi taaneqartoq piffissaq aalajangersimasooq, qinnuteqarnikkullu sivitsorneqarsinnaasooq, nallertinnagu akilerumallugu akuersippat.

Imm. 2. Nalunaarummut imm. 1-imi taaneqartumut tunngatillugu aalajangersakkat Kalaallit Nunaanni eqqartuussisarnermi inatsimmi kapitali 5-imi, unnerluussinermik imaqtartut aammattaaq atuupput.

Imm. 3. Akiliisitsissut piffissaq eqqorlugu akilerneqarpat imaluunniit aalajangiunneqarnermi kingorna akiliisitsiniarnikkut akilersinneqarpat qanoq iliuuseqaqqittoqas sanngilaq.

§ 16. Inatsisartut inatsisaat ullormi 1. januar 1993-imi atuutilissaaq.

Namminersornerullutik Oqartussat, ulloq 30. oktober 1992.

Lars Emil Johansen

/

Emil Abelsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut